

Imartami sillimaniarnerup, umiarsuarnik nalunaarsuinerup, inatsiseqarnerup il.il. tamakkiisumik oqartussaaffigineqalersinnaaneri pillugit Naalakkersuisut UPA2020-mi nassuiaammik saqqummiussinissamik peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Henrik Fleischer, Siumut)

Akissuteqaat

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Naalakkersuisuniit imartami sillimaniarnerup, umiarsuarnik nalunaarsuinerup, inatsiseqarnerup ilaalu ilanngullugit tamakkiisumik oqartussaaffigineqalersinnaaneri pillugit Naalakkersuisut nassuiaammik saqqummiussinissamik peqquneqarnissaannik aalajangiiffigisassaattut siunnersuummut qjavugut.

Siunnersuuteqartoq imarsiornermut tunngatillugu pitsaasorpassuarnik oqaaseqarpoq, taakkunungalu suliaasaqarfiup periutsit inatsisillu eqqarsaatigalugit pisariunera ilaavoq.

Imartami sillimaniarnerup, imarsiornermut inatsisit umiarsuarnillu nalunaarsuisarnerup tiguneqarnissaannut misissuisoqassasoq siunnersuuteqartup siunnersuutigaa. Siunnersuummut saqqummiunneqartumut tunngatillugu Naalakkersuisunit maluginiaqquneqarpoq, Inatsisartut 2015-imi ukiakkut ataatsimiinneranni imm. 28-p ataani suliaasaqarfiit pineqartut tiguneqarnissaannut misissueqqissaarnermik suliaqarnissamut Naalakkersuisut peqquneqarsimmata. Misissueqqissaarnerq taanna suliarineqarpoq aammalu 2017-imi Upernaakkut Inatsisartut ataatsimiinneranni agguanneqarluni. Taassuma qulequtaraa ”Umiartornermut tunngasunik misissueqqissaarnerq, Namminersorlutik Oqartussat imarsiornermut tunngasunik tigusinissaannut periarfissanik misissueqqissaarnerq”.

Umiartornermut tunngasunik misissueqqissaarnermi suliaasaqarfinnik, aalajangiiffigisassatut siunnersuummi taaneqartunik tigusinissamut periarfissatut ilusiliat arlallit saqqummiunneqarput. Misissueqqissaarnermi inassutigineqarpoq, tigusisoqassappat suliaasaqarfiit tiguneqannginnerini ineriartortitsisoqartariaqartoq. Tamatumani ilaatigut siunissami suliaasaqarfiit isumaginissaanut piginnaaneqarfiit pisariaqartut qulakkeerniarneqarput.

Misissueqqissaarnermi naliliisoqarpoq, suliaasaqarfiit taaneqartut pingasuusut tigusinerup kingorna piffissami aallarnisarfiusumi Namminersorlutik Oqartussanut 35 mio. koruunit missaannik akeqassasut, tamatumalu kingorna ukiumut 25 mio. koruuninik akeqassallutik. Piffissami aallarnisarfiusumi aningaasartuutit qaffasinnerinut piginnaaneqarfiit tamakkiisumik pigineqalernissaasa tungaanut avataaniit siunnersorteqarnissap pisariaqarnissaanik naatsorsuutigisaqarnerq pequtaavoq.

Umiartornermut tunngasunik misissueqqissaarnerup suliarineqarnerata kingorna Kalaallit Nunaanni imarsiornermut atatillugu oqartussaasut, inatsisit ilaalu ilanngullugit annertuumik allannguuteqarsimangillat. Taamaattumik Naalakkersuisut naliliipput, misissueqqissaarnermi inerniliinerit kisitsisitigullu paasissutissat suli atuussimassasut.

Naalakkersuisut inassutigaat siunnersuut akuerineqassasoq, allannguutissatut siunnersuut imaattumik ilallugu: Imartami sillimaniarnerup, umiarsuarnik nalunaarsuinerup, inatsiseqarnerup ilaalu ilanngullugit suliaqqarfiup tamakkiisumik oqartussaaffigineqalersinnaaneri pillugit ataqatigiissakkamik nalilersuisoqassasoq 2020 Ukiaanerani ataatsimiinnissamut.